



PRIMEIRO MINISTRO

**DISKURSU SUA EXELÉNSIA PRIMEIRU-MINISTRU
KAY RALA XANANA GUSMÃO
IHA OKAZIAUN SORUMUTUK ALTU NIVEL DAHULUK IHA FORUM
NASAUN ARKIPÉLAGU NO ILLAS (EIA)**

**“PROMOVE KOLABORASAUN, HODI PERMITE INOVASAUN BA ITA-
NIA OSEANU NO ITA-NIA FUTURU”**

Bali, Indonézia
Loron 11 fulan-outubru tinan 2023



Palácio do Governo
Avenida Marginal
Dili, Timor-Leste

Sua Exelénsia Señór Prezidente Repúblika, Joko Widodo

Suas Exelénsias Xefes Estadu no Governu

Exelénsias

Señoras no señores,

Hanesan onra boot ida hodi partisipa iha Sorumutuk Altu Nivel ba Dahuluk Nasaun Arkipélagu no Illas nian.

Ha'u hakarak agradese ba konvite husi Sua Exelénsia Prezidente Repúblika Joko Widodo no hato'o ha'u-nia apresiasaun ba Governu Indonézia ba ninia laran luak ne'ebé fó ona mai ami.

País hotu-hotu ne'ebé reprezenta iha-ne'e, halibur-malu liuhusi oseanu.

Oseanu fó moris mai ita. Oseanu liga umanidade no fó mai ita identidade komún, dezafiu no ambisaun hamutuk.

Forum ida-ne'e ho objetivu atu promove kooperasaun no solidariedade atu ita hamutuk bele buka solusaun ba dezenvolvimentu sustentavel iha ita-nia Estadus no ba konservasaun tasi.

Hanesan maioria husi Estadus Illa Ki'ik sira, Timor-Leste mak vulneravel ba alterasaun klimátika no destruisaun ba ami-nia ativu (rikusoin) ne'ebé boot tebes – ami-nia ambiente tasi iha ninia diversidade no ninia furak tomak.

Tanba ne'e maka iha fulan kotuk, Timor-Leste marka prezensa iha Tribunál Internasional kona-ba Direitu Tasi iha Hamburgo, iha kazu istóriku ho Paresér Konsultivu kona-ba Obrigasaun Estadus relasiona ho Alterasaun Klimátika no Ambiente Tasi.

Maske ita la iha responsabilidade ne'ebé hanesan ba alterasaun klimátika, ita hotu sei terus. No Nasaun illa ki'ik sira terus makaas liu ona kompara ho nasaun sira ne'ebé kauza problema ne'e.

Haree ba faktu ne'e, Konvensaun Nasoins Unidas kona-ba Direitu Tasi (CNUDM-sigla iha lian portugés) estabelese ona prinsípiu responsabilidade komún, maibé diferente, liga ho obrigasaun Estadu nian.

Labele husik liu ba kotuk País sira ne'ebé iha hela dezenvolvimentu. Ami iha direitu soberanu atu dezenvolve an no iha obrigasaun atu proteje ami-nia ambiente.

Hanesan mós ho Indonézia, finalizasaun ami-nia fronteiras marítimas ne'e importante ba Timor-Leste. Ami hetan ona akordu ho Austrália, liuhusi prosesu konsiliaсаun obrigatória dahuluk ne'ebé sempre iha CNUDM ninia okos.

Daudaun ne'e ami tenta hodi finaliza ami-nia fronteiras marítimas ho Indonézia, ho espíritu amizade no kooperasaun. Uainhira konklui negosiasaun idane'e ho Indonézia, ami sei bele analiza projetu peska sustentável iha ami-nia tasi no ajuda hapara peska ilegál ne'ebé estraga ami-nia biodiversidade mariña.

Ami mós koopera hela ho Indonézia hodi kria parke mariñu ida ba jestaun sustentável ami-nia tasi.

Ha'u hakarak parke ida-ne'e bele sai koñesidu hanesan Parke Pás nian, la'ós de'it ba ninian valór simbóliku, maibé mós atu hatudu ninia importánsia iha konservasaun ba ami-nia biodiversidade no dezenvolvimentu komún.

Timor-Leste no Indonézia ne'ebé lokaliza iha Triángulu Korál, área ida ho diversidade biolójika mariña ne'ebé boot liu iha mundu.

Indonézia harii ona parke nasional barak ne'ebé furak tebes, inklui Parke Nasionál Komodo, ne'ebé lokaliza besik tebes ami-nia país.

Iha Timor-Leste, ami hahú halo promosaun ba Ekonomia Azúl, hanesan dalan seluk ida ba dezenvolvimentu nasional.

Inisiativas hanesan AIS Blue Hub, Sentru Investigasaun no Dezenvolvimentu no Índise Dezenvolvimentu Ekonomia Azúl sei fó apoiu ba ami-nia esforsu sira.

Illa Ataúru, situa kilómetru 30 de'it husi ami-nia capitál Dili, ne'ebé iha tasi ho biodiversidade boot liu iha mundu.

Ami estabelese hela Sentru Investigasaun no Edukasaun Mariña ida iha Illa Ataúru no ami prepara an atu deklara tasi ne'ebé hale'u illa ne'e hanesan parke nacionál mariñu.

Belun sira, forum ida-ne'e hanesan oportunidade beinvinda ida hodi hametin ita-nia ligasaun komún ho oseanu no serbisu hamutuk hodi alkansa dezenvolvimentu sustentável no konservasaun mariña.

Ha'u atu termina, dala ida tan hato'o ha'u-nia apresiasaun ba lideres Indonézia tanba fasilita ona kolaborasaun entre Nasaun arkipélagu no illas iha ita-nia oseanu no ita-nia futuru!

Obrigadu barak.

Kay Rala Xanana Gusmão